

Jaunaren aurkezpena (Otsailaren 2an)



SARRERAKO OHARRA

Senideok: gure ohituretako asko euren esanguratik hustu egin doguz, eta beste esangura batez darabilguz, desitxuratuta eta sasi-esanguraz. Gaurko hauxe dogu bat: kandelario.

Oharretan eta otoitzetan esango dogunetik kanpoko ohikerietan galdu gara. Gure kandelen eta ohituren esanahia eskuratu nahi dogunok, ba, jarraitu daigun arretaz sarrera-ohikune hau; eta kandelak biztuta, urten daigun bidera jatorkun Jaunaren bila.

Kandelak biztu daiezela...

Abadearen agurra

.../..

(Eleiztarrak eta kandelak ureztatu eta presbiteriorantza abiatu, abesti artean):

Jesus, munduko
argia,
Jesus, zinezko egia,
Jesus betiko bizia.

Gure bihotz barruan
biztu zure argia;
gaitezen gu
munduan
argi Jainkoz betia.

Etxeetan, herrietan
izan danen nausia,
gu guztiok zure baitan
dezagun poz bizia.

HITZAREN LITURGIA

Hb 2, 14-18

Hebertarrei egindako idazki txatal honek Jesusen misteriora hurreratzen gaitu, eta Jesus ezagutzen laguntzen deusku. Begira noraino egiten dan gizakiarekin bat Jainkoa bere Semeagan!

Hebertarrei egindako liburutik

Familia bereko seme-alabek odol eta haragi bat bera daben lez, Jesusek giza odol-haragiak hartu zituan, bere heriotzaz heriotzaren nagusia dan deabrua ezerezteko, eta heriotzearen bildurrez euren bizitza osoan esklabo bizi ziranak askatzeko; ha ez zan-eta aingeruei laguntzera etorri, Abrahamen jatorrikoei baino. Horregaitik, gauza guztietan bere senideen antzeko izan behar eban, abade nagusi errukitsu eta Jainkoari jagokozan gauzetan fidagarri izateko, herriaren pekatuak parkatzeko gai.

Bera ere nekeetan probatua izan zalako, gauza da orain probaldian dagozanei laguntzeko.
Jaunak esana.

Erantzun-salmoa:

R/. EGIN TXALO ERREGE DAN JAUNAREN AURREAN

Ateburuok, goratu zaiteze,
aspaldiko ateok, luzatu zaiteze,
Errege ospetsua sartu daiten. R./

Nor da errege ospetsu hori?
Jaun indartsu eta ahaltsua,
guduan Jaun ahaltsua. R./

Ateburuok, goratu zaiteze,
aspaldiko ateok, luzatu zaiteze,
Errege ospetsua sartu daiten. R./

Nor da errege ospetsu hori?
Gudari-taldeen Jauna,
bera da errege ospetsua. R./

Lk 2, 22-40

Hona Lukas ebanjelariak zelan batzen dauen bere aldiko tradizioa eta beteazoten dauan Jesusengan; esanguratsua da ebanjelio-zati hau, eta eredugarriak bertan agertzen diran atso-agureak.

Aleluia

† Jesukristoren ebanjelioa s. Lukasen liburutik

Moisesen Legearen arabera, amari garbikuntza egiteko unea heldu jakonean, gurasoek Jerusalemara eroan eben Jesus, Jaunari aurkezteko. [Izan ere, honan dago aginduta Jaunaren legean: «Lehen-sume guztiak Jaunari sagaratuko jakoz». Jaunaren legean ezarritako oparia ere eskeini behar eben: «Usapal bi edota usakume bi».

Bazan Jerusalemen Simeon izeneko gizon bat, gizon zintzo eta jainkozalea, Jainkoak Israel noiz kontsolatuko zain egoana. Espiritu Santua beragaz eban, eta aditzera emon eutson ez zala hilgo Jaunaren Mesias ikusi arte. Eta Espiritu Santuak eraginda tenplura joan zan.

Gurasoek Legeak agintzen ebana beteteko Jesus umea tenpluan sartzean, hartu eban Simeonek umea besoetan eta Jainkoa bedeinkatu eban, esanez:

«Orain itzi daikezu, Jauna,
zeure morroi hau bakean hiltan,
Zeuk agindu zenduan lez.
Ikusi dabe nire begiok Zugandiko salbamena,
herri guztien aurrean Zuk aurkeztua:
Nazinoak argitzeko argia
eta zure herri Israelen ospea».

Umearen aitamak harriturik egozan umeagaitik esaten ziranakin. Eta Simeonek bedeinkatu egin zituan, eta umearen ama Mariari esan eutson: «Begira, hau israeldar asko jausteko eta beste asko jagiteko ipinita dago; eztabaida sortzen dauan ezaugarri izango da, holan bihotz askotako asmoak agirian gelditu daitezana. Eta zeuri ezpata batek alde zulatuko deutsu arimea». Jaunak esana.

ESKARIAK

† Senideok: gizaldiz-gizaldi zaintzen gaituen Jainkoari zuzendu deioguzan gure eskariak:

—Gure Eleizbarrutiaren alde: Eleiztar guztien bihotzak eta adimenak argitzeko benetako argi izan daiten Ebanjelizatze Egitasmo honetan, *eskatzen deutsugu, Jauna*.

- Eragozpenak aurkitzen dituen familien alde: maitasun-iturri dan Jainkoagana hurreratu daitezcan itxaropenez, eta aurkitu daien harengan bizi izateko poza eta alkar maitatzeko adorea, *eskatzen deusugu, Jauna*.
- Sinismen ezaugarriak euren esanguran barik, beste edo-zer lortzeko erabilten dituenen alde: aurkitu daien benetako esangurearen poztasuna, *eskatzen deusugu, Jauna*.
- Jaunaren aurkezpen egun honetan eukaristiara hurreratu garanon alde: gure bihozbarritzea eta ebanjelioaganako zintzotasuna bilatu daiguzan, *eskatzen deusugu, Jauna*.

† Egizu, Jauna, ez gaitezala ezelango ilunpetan galdu, zeure argitasunean bizi izan baino. Jesukristo gure Jaunaren bitartez.

—Amen.

JAUNARTZE ABESTIA

Gure ondoan, Jauna, egon zaitez beti,
Zu zara gure bide eta gure bizi. (bir)

Zu zara, Jauna, Zu gure artzain, / eta gu zure artalde,
nora ezean ibiltzen gara / ardi gaixook zu gabe.
Nora ezean ibiltzen gara / ardi gaixook zu gabe.

OHARRAK

Azken agurra

Urrundu gaitezcan sasikerietatik. Ez daigula kandela hau beste ezertarako erabili Jesus dogula argi adierazteko baino. Biztu daigun otoitz egiten dogunean, gaisorik gertatzen garanean edo triste gagozanean; eta sentitu daigun Jesusek zelan argitzen gaituan.

Jesus, munduko
argia,
Jesus, zinezko egia,
Jesus betiko bizia.

Gure bihotz barruan
biztu zure argia;
gaitezen gu
munduan
argi Jainkoz betia.

Etxeetan, herrietan
izan danen nausia,
guztioz zure baitan
dezagun poz bizia.